



26 Disember 2017
26 December 2017
P.U. (A) 409

WARTA KERAJAAN PERSEKUTUAN

FEDERAL GOVERNMENT GAZETTE

PERATURAN-PERATURAN CUKAI AKTIVITI PERNIAGAAN LABUAN (PELAPORAN MENGIKUT NEGARA) 2017

LABUAN BUSINESS ACTIVITY TAX (COUNTRY-BY-COUNTRY REPORTING) REGULATIONS 2017

DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

AKTA CUKAI AKTIVITI PERNIAGAAN LABUAN 1990

PERATURAN-PERATURAN CUKAI AKTIVITI PERNIAGAAN LABUAN (PELAPORAN
MENGIKUT NEGARA) 2017

PADA menjalankan kuasa yang diberikan oleh seksyen 21 Akta Cukai Aktiviti Perniagaan Labuan 1990 [*Akta 445*], Menteri membuat peraturan-peraturan yang berikut:

Nama

1. Peraturan-peraturan ini bolehlah dinamakan **Peraturan-Peraturan Cukai Aktiviti Perniagaan Labuan (Pelaporan mengikut Negara) 2017**.

Tafsiran

2. Dalam Peraturan-Peraturan ini, melainkan jika konteksnya menghendaki makna yang lain—

“entiti konstituen” ertinya—

- (a) mana-mana unit perniagaan yang berasingan suatu Kumpulan MNE yang dimasukkan dalam penyata kewangan disatukan Kumpulan MNE itu atau yang akan dimasukkan jika kepentingan ekuiti dalam unit perniagaan itu diniagakan di bursa sekuriti awam;
- (b) mana-mana unit perniagaan yang berasingan suatu Kumpulan MNE yang tidak dimasukkan dalam penyata kewangan disatukan Kumpulan MNE itu semata-mata atas alasan saiz atau kepentingan;
- (c) mana-mana establismen tetap mana-mana unit perniagaan yang berasingan Kumpulan MNE yang disebut dalam perenggan (a) atau (b), dengan syarat unit perniagaan itu menyediakan penyata kewangan berasingan bagi establismen tetap itu bagi maksud pelaporan kewangan, pengawalseliaan, pelaporan cukai atau kawalan pengurusan dalaman;

“entiti pemegangan muktamad” ertinya suatu entiti konstituen suatu Kumpulan MNE yang memiliki secara langsung atau tidak langsung suatu kepentingan yang mencukupi dalam satu atau lebih entiti konstituen yang lain Kumpulan MNE itu dan tiada entiti konstituen lain kumpulan MNE itu yang memiliki secara langsung atau tidak langsung kepentingan itu dalam entiti konstituen yang mula-mula disebut itu;

“Kumpulan MNE” ertinya suatu kumpulan perusahaan multinasional yang berkaitan melalui pemilikan atau kawalan yang dengan itu ia dikehendaki untuk menyediakan penyata kewangan disatukan bagi maksud pelaporan kewangan di bawah prinsip perakaunan yang terpakai atau akan dikehendaki untuk berbuat demikian sekiranya kepentingan ekuiti dalam mana-mana perusahaannya diniagakan di bursa sekuriti awam yang termasuk—

- (a) dua atau lebih perusahaan yang mastautin cukainya adalah di dalam wilayah bidang kuasa yang berlainan; atau
- (b) suatu perusahaan yang merupakan entiti Labuan yang menjalankan aktiviti perniagaan Labuan dan tertakluk kepada cukai berkenaan dengan perniagaan yang dijalankan melalui suatu establismen tetap di dalam wilayah bidang kuasa yang lain, atau suatu perusahaan yang bermastautin di dalam wilayah bidang kuasa yang lain dan tertakluk kepada cukai berkenaan dengan perniagaan yang dijalankan melalui suatu establismen tetap di Labuan;

“Laporan mengikut Negara” ertinya laporan yang disebut dalam peraturan 4;

“tahun kewangan” ertinya suatu tempoh perakaunan tahunan yang berkenaan dengannya entiti pemegangan muktamad suatu Kumpulan MNE menyediakan penyata kewangannya;

“tahun kewangan pelaporan” ertinya tahun kewangan yang keputusan kewangan dan operasinya ditunjukkan dalam Laporan mengikut Negara.

Pemakaian

3. Peraturan-Peraturan ini terpakai bagi suatu Kumpulan MNE yang—
- (a) jumlah hasil kumpulan disatukan dalam tahun kewangan sebelum tahun kewangan pelaporan ialah sekurang-kurangnya tiga bilion ringgit; dan
 - (b) entiti pemegangan muktamadnya atau mana-mana entiti konstituennya ialah suatu entiti Labuan yang menjalankan aktiviti perniagaan Labuan.

Laporan mengikut Negara

4. (1) Bagi maksud Peraturan-Peraturan ini, suatu Laporan mengikut Negara berkenaan dengan suatu Kumpulan MNE hendaklah mengandungi—

- (a) maklumat agregat yang berhubungan dengan amaun hasil, keuntungan atau kerugian sebelum cukai pendapatan, cukai pendapatan yang telah dibayar, cukai pendapatan yang terakru, modal yang dinyatakan, perolehan terkumpul, bilangan pekerja dan aset ketara selain tunai atau yang setara dengan tunai berkenaan dengan setiap wilayah bidang kuasa yang di dalamnya Kumpulan MNE itu beroperasi; dan
- (b) pengenalpastian setiap entiti konstituen Kumpulan MNE itu yang menyatakan wilayah bidang kuasa mastautin cukai entiti konstituen itu, dan wilayah bidang kuasa yang di bawah undang-undangnya entiti konstituen itu diperbadankan, didaftarkan atau ditubuhkan jika ia berlainan daripada wilayah bidang kuasa mastautin cukai entiti konstituen itu, dan sifat aktiviti atau aktiviti-aktiviti perniagaan utama entiti konstituen itu.

- (2) Maklumat kewangan yang disebut dalam perenggan (1)(a) hendaklah disebut dalam ringgit Malaysia (RM).

(3) Maklumat yang dikehendaki dilaporkan di bawah peraturan ini hendaklah mulai 1 Januari 2017.

(4) Laporan mengikut Negara hendaklah difailkan mengikut borang yang ditetapkan di bawah seksyen 21A Akta dalam medium elektronik, atau melalui penghantaran elektronik, dalam format bahasa penanda boleh perluas.

Kewajipan pemfailan

5. Entiti pemegangan muktamad suatu Kumpulan MNE yang merupakan suatu entiti Labuan yang menjalankan aktiviti perniagaan Labuan hendaklah memfailkan Laporan mengikut Negara yang mematuhi kehendak peraturan 4 dengan Ketua Pengarah berkenaan dengan tahun kewangan pelaporannya dalam tempoh yang dinyatakan dalam peraturan 7.

Pemberitahuan

6. (1) Mana-mana entiti konstituen suatu Kumpulan MNE yang merupakan suatu entiti Labuan yang menjalankan aktiviti perniagaan Labuan hendaklah memberitahu Ketua Pengarah secara bertulis jika entiti konstituen itu merupakan entiti pemegangan muktamad pada atau sebelum hari terakhir tahun kewangan pelaporan.

(2) Jika suatu entiti konstituen Kumpulan MNE yang merupakan suatu entiti Labuan yang menjalankan aktiviti perniagaan Labuan bukan merupakan entiti pelapor, entiti konstituen itu hendaklah memberitahu Ketua Pengarah secara bertulis identiti dan mastautin cukai entiti pelapor, pada atau sebelum hari terakhir tahun kewangan pelaporan.

(3) Mana-mana entiti konstituen Kumpulan MNE yang merupakan suatu entiti Labuan yang menjalankan aktiviti perniagaan Labuan yang melanggar subperaturan (1) atau (2) melakukan suatu kesalahan dan boleh, apabila disabitkan, didenda tidak melebihi satu juta ringgit atau dipenjarakan selama tempoh tidak melebihi dua tahun atau kedua-duanya.